

四庫全書

集部

欽定四庫全書

集部

春草齋集卷二

詳校官庶吉士<sub>臣</sub>龍廷槐

中書臣劉源溥覆勘

總校官進士<sub>臣</sub>朱鈐

校對官中書<sub>臣</sub>李棨

謄錄監生<sub>臣</sub>王叔愚

欽定四庫全書

集部六

春草齋集

別集類五

明

提要

臣等謹案春草齋集十卷明烏斯道撰斯道字繼善慈谿人洪武初官石龍縣知縣調永新坐事謫戍定遠尋放還明史文苑傳附見趙璜傳中所著有秋吟稿及此集千頃堂書目載秋吟稿之名而闕其卷數蓋明代已佚

此集凡詩五卷文五卷與千頃堂書目卷數  
相合蓋猶舊本也斯道詩寄托深遠吐屬清  
華能剗滌元人繁縟之弊文亦雅令不為劍  
拔弩張之狀夷猶淡泊頗近自然宋濂為作  
集序所謂俊潔如明月珠者蓋狀其圓潤所  
謂洶湧如春江濤者則與其文之紆餘為妍  
頗不相肖推濂之意特狀其詞源之不竭非  
謂其騁才恃氣以驚風駭浪為奇特也史稱

斯道工古文兼精書法不及其詩殆在當時  
文尤見重於世歟乾隆四十六年十月恭校

上

總纂官臣紀昀臣陸錫熊臣孫士毅

總校官臣陸費墀



春草齋集原序

世之學者必有師雖百工伎藝之微亦必有以相授然後能造其間與況為文者發造化之秘貫古今之統苟無以管攝而闡闢之則何以盡其變化不測之妙若不傳之於師奚可哉吾鄉修道先生胡公以光明正大之學發為精深嚴簡之文訓迪學子篇章句字皆有法往往從之者多得文之旨趣其所造固有淺深高下之殊而體裁終不失於古四明夢堂噩師雖居浮屠中能久

與先生游先生為文之法實與聞之烏君繼善自幼學  
文於夢堂凡先生所指授者悉以語烏君故烏君之為  
文俊潔如明月珠起伏如春江濤余因語二三子曰必  
如烏君然後可以言文也若無師授其可易致是哉余  
嘗譬之有美錦焉使朝市縫人製之則能中度而適體  
委以礪穴之粗工則左低而右昂上侈而下斂錦固錦  
矣其如不合作何文之無師授者亦若斯而已余老且  
多病文字一切謝去不作縱有一二類皆假手於人獨



喜烏君之文親題其首簡而歸之於乎余生也後雖居  
先生之鄉而不能傳先生之學其於烏君又豈能無慊  
於中哉烏君名斯衢繼善字也明之慈谿人嘗知化之  
石龍縣今調吉之永新其為人也溫然如玉蓋與文相  
稱云金華宋濂撰

春草齋集原序

欽定四庫全書

春草齋集卷一

明 烏斯道 撰

五言古詩

松溪漁隱

青松何矯矯溪水何泠泠中有垂緇者悠悠樂中情濯  
足繁陰底涼颼吹我纓四山閒無人一鳥空中鳴層臺  
肅羣仙空壇森百靈白雲被廣路瑤花繚幽扃明月忽

在水浩歌激青冥勝地東南富漁者江海盈茲味一何  
寡高風吁獨清

答胡徵君舜咨還山

高跡寄空谷幽居託田間江水非吾限可以相往還遊  
魚當在淵飛鳥當在山謝此城郭遊逸駕不可攀還山  
濯清泚何如冰雪顏

其二

君子保厥軀于以待昌時白日懼顛蹶夜行不傾危歸

心若金石固留終我違譬彼出峽舟欲挽不可追山神  
亦已怨來歸一何遲

詠史

商顏避秦烈何獨有園綺如何隆準公泗鼎不可起謀  
猶信留侯仁慈在儲嗣安劉匪平勃誠由四翁耳豈中  
烟霞疾徒與麋鹿死芝草長滿山誰歟繼修軌嗟哉司  
馬公一傳靳青史排難何足云乃傳魯連子

病中興感因成七詩寄蒲庵老禪

青天湛秋水明月揚素波浮雲自何來漫漫掩星河中  
宵月離畢晨朝俾滂沱蟬蛩乃止之時雨良不多天道  
本無意咄咄其如何

其二

人生惡好勝水關良足嗤有口貴守默石言豈其宜桑  
田可衣食忍使魚龍歸青山可結構迺向空中飛地道  
本寧靜咄咄何如茲

其三

猗蘭畏陽盛甘鞠懼蟲食昌陽惡溪涸揭車傷土瘠上  
有寄生草蒙茸託松栢下有無名花紛披弄佳色尋芳  
邈無人空有馨香德

其四

螂蛆素甘帶鴟鶚喜食鼠蛇長即吞象蝟小能制虎鷹  
鷗與鴛鴦生同被毛羽胡不念同類搏擊苦相侮鴛鴦  
好文采疇能愛憐汝

其五

病中無所為據梧觀品彙品彙自錯迕吾何發長喟彼  
美蒲菴叟守道已淳備靜坐一室中縣解六合內朗譚  
逍遙篇警服許詢輩

其六

公讀西竺書我讀東魯文我坐支葉煩復有彼此分何  
當罄忘之緇素如一人譬生文字先同為葛天民無言  
亦無辯熙熙樂芳春

其七



相別無一語相見無一言如何忘形者遠情復相牽我  
持江上風遺公吹法筵公以竹間月照我調素絃風比  
錦綉段月比青琅玕

題寒林遠岫圖

遊子念故山歲晏不得歸出門見林薄日暮烟火微關  
河渺千里猿狖聲正悲況爾霜雪繁鳥道不可躋陽春  
固伊邇奈此寒無衣衣寒何足歎所憂美人違

葉國諒赴蘭亭書院山長

考槃衡門下階前芳草深方池耀晴旭遙天墮鳴禽之  
子方訣別驅車向山陰山陰予故游矯首追登臨崇山  
俯清曠迴湍激靈襟風磴石齒齒孤亭樹森森達人不可  
作詠歌有遺音流光三十載再往違素心惟將飄飄  
思中夜托瑤琴君子美如玉於茲遂幽尋暮春服單袷  
涼颼集冠簪宴坐雲霞谷徘徊松竹林至理忽自得俛  
仰無古今

與揭伯防先生桂彥良重遊東山分韻得鳥字

荏苒歲云暮霜露摧百草東山松柏姿青青故相好我  
有違曠思戾茲涉遠道斗酒斟酌之良以慰孤抱所悲  
無定居依依若飛鳥願藉山中雲優游以終老

野人居為陳則顏賦

江城有甲第樓閣高嵯我朝騎駿馬出馳騁意氣多我  
居田野中衡門掩藤蘿歲月不易得聊以保天和清風  
起蘭芷明月揚素波琴書正可陳奈此閒靜何況茲桃  
花村仙源入山阿山中有儔侶亦足同嘯歌

邀友人胡舜咨姚晉道劉庸道北郊夜坐

美人集江郊圓月湛秋夕天闊星宿繁地迴鷄犬寂供  
具雖不殷各取意所適抽辭託卮匝燕坐更几席既盡  
遐邇懷復有新故益涼風激庭柯澄波照林石零露不  
作寒層霄愈凝碧緬思江海內軒蓋相馳激酬酢過為  
歡友道諒匪得

送薛彥仁之京

夫君丈夫雄出處寧草草孤踪抗浮雲貞心獻穹昊非

類徒見招榮名宣庸蚤松栢藉霜雪騏驥思遠道願言  
持此心皦皦以終老

其二

朝見故人家莫別衢路側意長乏交歡言短悲夙昔南  
風促征艫迅若高騫翼天吳不敢驕帖帖戾京國今予  
起遐思中宵睇奎壁

答胡徵士

疇昔見君子往來山野間野鳥不相忌山花澹相看彼

蒼今何爾獨伴落塵凡矧復曠言笑寤寐不自安天地  
一居室萬里猶咫尺達人解天游出處隨所適所交或  
相違何必懷惻惻颯爾精靈通終焉若金石

飲天游室夜大雨移席有作

炎歊尼歡宴露坐希夜長望舒闕金波屏翳決銀潢飛  
廉亦馳驟萬馬集戰場孱姿或沮喪壯懷當激昂丈夫  
幹化機晦冥寧我傷清醕既不置華燈豈辭張楚歌激  
忠肝越吟思遠鄉卜畫固前聞夜飲詩所臧願言各盡

醉頃刻遠相望  
緬懷芙蓉洲  
池閣風雨涼  
遺音若金石  
百載不能忘

題坦腹江亭圖

晴光耀叢芷  
涼飈激微波  
層雲汎林麓  
猿猱度烟蘿  
亭中有粲者  
感慨亦何多  
疏襟獻蒼天  
天闕高嵯峨  
北轅繆阡陌  
南州阻江河  
琅玕腹中富  
奈此遲莫何  
踟躕嗟魚鴈  
悠悠泳春和  
江山百靈集  
憑虛一高歌

蔡節婦詩

開門見江水江上有青山青山易黃落江水易波瀾婦  
心寂不移白首無覩顏衣藏錦文新鏡掩銅花斑惟憂  
鳳一去母雛日饑寒

其二

奉姑憂戚中訓子識字初金鳳買姑藥繡麟易子書姑  
沒子已長今當子孫娛朱萱隔疎箔翠竹森前除春酒  
洽鄰母暮齒為何如

中秋遲雲林先生不至越五日見訪有感



美人涉江水愛此鷗鷺閒  
參差各悵望江水渺波瀾  
蕭蕭風日中藹藹松竹間  
天乎貸予時再晤良不難

其二

美人涉江水將以采芳草  
空筐非所思踟躕向周道  
豈無江上花容華戾中抱  
白露秋已零其能棄衰槁

大生堂

美人坐高堂階前春草碧  
朝陽煦遊鱗晴風送飛翼  
出門事瞻眺花開滿阡陌  
衆山亦前陳青青有佳色  
天地

何心哉生意靡休息吾有長桑術於焉婉茲德

過西山訪章願學鍾聲伯二隱者兼與同遊諸

公分韻得深字

冬雨久不作冰霜謝窮陰予因積遐思於焉事追尋西  
山數君子幽居託雲林岡巒負城郭在樂不在深旨酒  
罄良覲嘉言諧素心岩花照紋楸松風墮鳴琴詎謂兵  
革餘得以疏煩襟人生易凋謝何時續斯今離別奚足  
歎願言懷德音

題江閣燕坐圖

青山凝微靄澄江耀晴空層坡積餘潤綠樹披清風彼  
美衣冠者燕坐江閣中手持高士傳目送歸飛鴻天朝  
羅俊髦岩穴何春容吾知松關路未啟白雲封

石龍人日山行

坡坂屢崇卑上馬復下馬老懷雖云壯奈此筋力寡解  
鞍憩繁陰紆鬱聊自寫所遭無仙凡所思何取舍蒼藤  
綴流蘇鳴禽咏風雅白雲自西來故作忘形者

其二

晨興趣歸馬中塗山雨傾薄言避村舍道遠復紆縈林  
密不能蓋衣濕強前征雲氣益昏翳潦水益縱橫得非  
山靈意留予卧山庭似此庶不惡悠哉有餘情

力農三詩

家貧無土田未嘗操耒耜父母令讀書但事秉筆耳今  
當為老農何堪即任此學之良不難所恨吾老矣

其二

黎明驅牛出日暮荷鋤歸土荒三十載往返無舊蹊荆  
棘刺兩脛草根固深泥不辭筋力倦但恐官事違

其三

日出事輸作先日聽新令黽勉田野中奈此草萊盛鋤  
壑知土脉耕牧識牛性夕歸還讀書聊以俟天命

徐梅澗先生授余琴予寫曲調之意賦詩九章  
修禊

春風播良時品彙齊化鈞崇山鳴衆羽清流躍纖鱗詠

觴托修褱俛仰懷昔人寂焉千載事傷哉百年身令德  
苟不著修短何足云

忘機

達人解天弢處世聊復爾朋友相徵逐親戚自悲喜聽  
禽坐春風觀魚俯秋水閒雲無定姿虛舟隨所止俛仰  
天地間謾謾清風起

碧桃

琳宮闕白日瑤臺接青冥雲旗自飄飄陰風自泠泠鸞

鶴窻無影佩環寂無聲高崖碧桃花澹然獻春榮惟待  
王子晉繁陰坐吹笙

玉樹臨風

皎皎庭前樹溫溫如綠玉春風發欣榮春雨為膏沐橘  
華淨相妍瑤草紛相屬豈非方壺中光彩同煜煜鳳鳥  
何從來睥睨下朝旭

澤畔

上征天無風遠遊橐無金種蘭蘭不芳行吟向江渚漁

父曠達者庶幾知我心鶴鳴子不和徒然有哀音跼蹐  
當奈何湘水清且深

皎月

鏡照在尋丈水鑑纔尺咫團團中天月六合光芒裏纖  
毫不可遺形影隨所似自非太陰精何能得如此終古  
凜清澈雲翳徒為爾

白雪

皇天厭凡汙縞素飾下土清光辟回邪嚴威折強禦初



飛陋瓊華既積差鶴羽一塵苟相千萬目斯共覩吁嗟  
窮陰中玄機孰能杜

春江

長江亘荆揚悠哉復悠哉巴山春雪消騰薄聲如雷牛  
馬不可辨鼃鼃敢徘徊雄風挾長浪雲氣何從來歛焉  
載神龍浩蕩凌氛埃

瀟湘水雲

英英水上雲乃在瀟湘間朝隨江風出暮逐江風還盤

旋復縹緲遙連九疑山重瞳不可見但見江竹斑明月  
照洲渚於焉發長歎

送丘文湜之西涼

清華老山人三子讀書者操筆起雲烟何曾識戎馬父  
昔守韶州被謫西涼戍十年事弓刀風沙走邊路去年  
寄書歸身老無膂力爾即代父行甘心入軍籍朔風天  
正寒一去萬里餘讀書知有父何必守故廬未得父書  
時大兄備點兵父老不得力母別赴南京爾去無六親

父子兩相倚大兄妻為炊母僅托少弟父子共四人三  
人在行伍天上一團月照見三處苦爾孝感天地豈久  
行伍間飛騰入霄漢何能不東還

寄友胡舜咨九首

獨客春江上懷人清夜闌昔日錢塘月今夕照靈山吾  
恐靈山飛送君西湖灣

其二

我有絃上音寄君託清風一曲邈高懷於以寫幽衷明

月在流水閒雲飛碧空

其三

我有牕前草采采持贈君君心一何苦答以山中雲片  
片有五色盈盈如錦紋

其四

鴛鴦好文綵悠悠汎清漪清漪照見影自喜還自悲不  
敢高飛去鷹鷂滿天飛

其五

清風鳴樹間涼月照東壁我有同心人朗朗讀周易當  
問庖犧氏一畫何從得

其六

山中何所有文書可數車一月不出戶牕前落松花草  
玄云已畢傳者有侯芭

其七

昨夜有吉夢共君空中行既見鳳鳥出又見黃河清黃  
河洗雙耳坐聽鳳凰鳴

其八

君不能試劍我不能馳馬干戈正如此於何慰天下但願天衢通獻策如董賈

其九

古人重結交偃蹇百年間對面不為歡遠人力追攀咄咄何為爾知心良獨難

為貴朽石法師賦竹牕詩

種竹牕乃幽牕幽竹逾好孚甲炯外揚空虛默中抱疏

櫺午陰繁短枕秋聲早值者豈不多契茲良獨少多福  
闡玄機香山發天藻金石誰再宣琅玕自相保兀者今  
在斯於焉將遠紹亦嘗戾江皋觀我庭前草

春草雜言五首

驅車陟太行中道車輪折挽舟遡河流中流縵縻絕前  
途鬱漫漫徬徨欲還歸積雪被長坂洪濤蕩寒暄胡不  
戒未然間中慎所之徒懷百年志自貽千里悲借令無  
顛躋豈念出門非且將詒徒御羸糧一何遲

其二

荊棘開好花媚媚耀芳春羅生及周道未嘗罹斧斤斧斤或相加芒刺反傷人朔雪貸其死后土固其根人力媿孱弱天地胡不仁崇岡有松栢日日摧為薪

其三

中郎歎知己江夏殺所依愛憎生逆順良窳繆是非不憂漢室仆乃為董卓悲不憤奸雄術乃謫禰衡譏傷哉英傑士終為識者嗤



其四

饑不食虎肉寢不處虎皮虎皮非不煖虎肉非不肥本  
受惡氣生邈與正氣違奈何五行秀乃與惡相隨胡不  
觀鳳鳥猶能慎羽儀朝選竹實粲暮擇梧桐棲

其五

聞人訪聞人彼此無相疑聞人不相容皇皇欲何之我  
欲訪白雲白雲無定期我欲訪野鶴野鶴身高飛歸來  
看長松青青有餘滋

山居雜言二首

登山采薇蕨，薇蕨正柔止。朝行白雲中，暮行清風裏。芼之充我腸，其味淡而美。山翁笑相謂，子計殊晚矣。

其二

美人天一方，欲往不得早。落日近崦嵫，于何從遠道。矯首向天宇，踟躕蔓草聊。以待明發，勿復傷懷抱。

送劉庸道之閩

美人弄秋水，照映冰雪容。雲巾紫霞珮，合在蓬萊宮。蘭

舟桂為楫泛泛清江中今日西飛燕明日南飛鴻三山  
有仙客綠髮顏如童期爾乘白鳳縹緲翔天風

東山燕集

東山足游眺燕客開軒牕我冠粲新製綠酒澄春缸登  
高各能賦悠悠見西江朗懷發高詠逸思凌鴻龐睠茲  
典墳在弟昆才彥雙還歸愜幽意信哉歌樂邦

送舒汝臨叅軍秩滿歸

舒文靖公後四先  
哲即舒沈素楊也

吾鄉四先哲日星炳層空予心竊慕之繆窺文元公亦

復友其孫幽探日從容其孫守故丘欲以續宗風夫君  
丈靖裔嗣服尤顯庸萬里辭京國一官佐元戎予嘗拜  
顏色未言意先同今茲解綬歸重見將焉從踟躕無以  
贈耿耿獻深衷嘗聞古賢士中葉墜厥宗或人念遺胤  
徧訪樵牧中君材既翹楚此道必再隆官高固為榮年  
邁良可恫願言擴先志益俾垂無窮

送無作禪師住保福院

憶昔東臯上予嘗扣岩扃脩脩竹下宴坐挹高清正

見獨一翁孤標凜寒氷嘉言罄前哲四坐不厭聽予時  
方好修數數往親承開門見顏色藹然喜氣盈風塵三  
十載死生隔幽明每與公言此默默想儀刑公今大梅  
去又復感中情翁嘗此中住靈踪杳冥冥

送趙以衡歸錢塘

陟遠駕輜車汲深引修綆君子躋膺仕秉德在思永興  
言贊皇猷豈徒事馳騁波流正云橫舟楫當自整學古  
資未能寡事求內靜毋為負朱顏悠悠送清景

其二

竭力藝黍稷服賈牽車牛上堂奉甘脆二親何所憂辛  
勤以干祿亦復為親謀盡懼固無異寵榮非遽求朝昏  
食君賜鼎俎天光浮所貴保名爵不貽黃髮羞

其三

性醇而讀書黃流在玉璫孰云流俗中氣質類浮淺予  
方顧徘徊結交傷偃蹇得子良慰心奈此歲月晚迹曠  
心愈親意長言益短願言采芳馨贈之託脩遠

自然齋詩為周原夫作

廿載遊江海拂衣歸故宅故舊半凋零存者頭已白相  
見雖可悲亦足慰寥落有酒各招邀慷慨談夙昔

其二

丈夫志勲業豈不事一官追封親以榮樹德民以安道  
路阻且脩於焉息丘園矯首睇白日白日在雲端

其三

司晨促天曙攬衣步前庭粲粲幽花發靡靡春草青鉤

簾近清旭焚香讀義經門外有賓客欣然出相迎

其四

明月照東榮燕坐方自怡神清未欲寢款款訓佳兒勿

待金馬詔且誦石魚詩因之思厥祖高風播濂溪

石魚山在

慈溪西郊慈湖先生舊居

有詩原夫嘗息慈湖書院

其五

今日憺無事薄言疏我襟清風躡山梁煩歎憩松陰魚  
遊湖水淨鳥啼崖谷深朋友相邀坐行行論此心



松軒

種松不在直種松不在多種多人易之種直尋斧柯開  
軒比幽貞歲月忽已老美人招不來于何寫中抱刁刁  
松上風蕭蕭濯靈襟皎皎松上月悠悠照鳴琴

重過東山分韻得嘉字

燈張酌春酒酒盡情益加歲暮百事集在道不在他昨  
日水霜中風揭道上車我以隔歲別重來望雲霞脩竹  
散繁陰猗蘭茁新芽各保歲寒意嗟嗟良可嘉登高斥

卑陋飲清滌汙邪箴言復深夜中心永無遐

野菴為姜敬章監丞賦

敬章在田野時嘗夢天勅野歸四字故詩及之

樓船遡長江夾轂馳廣道君子田野中悠悠懷中抱前  
除列佳水其陰雜芳草亦有溪上山青青為之好吉夢  
良可徵將以託終老白壁匪淪匿彤庭藉華繅庶免栖  
故林徒焉寄枯槁歸哉豈無期所愧在先兆天恩固云  
深今德當自保

讀書樓為天台張隱士賦

仙山積層翠瑤臺薄青冥雲梯白麟下天柱青鸞鳴中  
有泊然者栖居讀遺經仙人好棲居無乃淪玉英交疏  
納朝采陰風肅泠泠託此遊聖涯諒以終餘生天子五  
雲內羣髦粲盈庭仙姿重圭壁束帛當見徵霞居越霄  
漢先後森百靈辭抽夙所秘賡歌答休明遐思古仙山  
何哉為重輕

繁隱為沈子俊賦

昔者清遐翁栖遲慕盤谷翛然桐葉側悠哉石魚麓綺

疏延白雲迴溪汎朱旭冥觀隘蓬瀛幽期託松菊日與  
文元公微言吐清馥高風邈難追百載有遺躅琴書信  
可娛畊釣聊自足故扁重揭之餘芳願私淑出處固靡  
常持身諒金玉

晚年病目詩

予心好讀書四庫未常閱予心好閑辭操觚未常輟夫  
何阻前期浮雲蔽明月翻思樵牧徒默默心自悅

其二

我常憶雷琴一去難再得目暗不能彈今亦不復惜以  
茲悟外物昔以有見惑何如飲美酒庶以慰朝夕

其三

予學二王書常在少壯日終年應人求運腕不傳筆茲  
以目病辭方始得就逸書以大道言何足盡稱述

其四

古人能戰爭空存身後名何況事碁局徒然起心兵余  
生頗好弈每被君子輕目暗不能爾心中始和平

其五

濁境人所惡清境人所懽懽惡感於境正謂雙目昏病目與境接不以清濁分譬居渾沌內何者為乾坤

其六

庭外有青草正是自家意今因雙目病復悟草之外意原不在草草亦不在視萬事奚可言風月浩無際

其七

左氏云喪明昭明亦復爾二人至修姱佳名播千祀喪

明予似之功業胡能比蝕月還耿光著述猶可擬

集杏花下

融風蕩春和芳葩粲當戶簇簇輕紅繁拂拂微馨吐佳  
時集羣英崇光汎尊俎興懷答春陽豈緣惜媚嫵素梅  
隕飄風天桃墮靈雨良會不可期盡樂飲此湑

春草齋集卷一



欽定四庫全書

春草齋集卷二

明 烏斯道 撰

七言古詩

十洲小艇歌為張彥密賦

木蘭為舟檣為櫂滄海鏡平雲貼貼五色珠光耀晴水  
倏忽往來三萬里偶見琴高相與遊琴高引路登十洲  
青天白日不肯暮此身但覺壺中秋我昔所思遊岱宗

顛崖恐墮羊角風西躡天梯華山頂見說希夷呼不醒  
南荒亦欲尋五羊五羊化石春草長何似十洲東海上  
紺宇琳宮屹相向仙人啗我養神芝青童出獻紫霞衣  
麟馭香車拂瑤草鳳舞瓊臺凌綵霓歸來醉卧舟楫閒  
千年一息清夢闌不比天台再無路桃花空放劉郎還  
有客相尋問生事未信于今薄人世回頭大笑語旁人  
指點吾舟在平地

胡宗器使汾陽得韓幹畫馬石刻歸以見贈作

歌遺之

胡君贈我韓幹馬一匹乃是汾陽舊傳刻雄姿逸態嗟  
奪真真馬見之俱辟易奔雷翻電不可見更有綠蛇兼  
紫燕此馬玄黃固難辨筋出玄中亦堪羨當時學得曹  
將軍筆有書法氣有神顧影徘徊未超越眼中恍惚如  
流雲一倏倦坐困方偃一倏裏脰曲未伸彷彿關頭雨  
新霽滿郊苜蓿涵青春胡君曾度太行去畫裏龍媒忽  
相遇涓人不用千黃金自覺矯駘世無數出入空騎驛

中馬挾此東歸愜幽悵座間披覽風為鳴記得汾陽舊  
游處汾陽正有郭相家恐是郭家獅子花千年相業尚  
不泯馬圖亦忍沈泥沙我今得此重歎息生者似今那  
復得信知房精在神駿形影空為人愛惜

大雅歌為冷起敬先生

先生名謙元至  
正十五年作

冷先生鼓大雅烏生聽之雙淚下雙檜堂前良夜深霜  
華照月發好音太羹玄酒忽在御無懷葛天殊懈心一  
彈明月不復動再彈颯颯風吹襟林神驚縮真宰泣江

流噴激蒼龍吟衆客方鼓舞烏生淚汎瀾烏生所思在  
古道耿耿不寐燈影寒周室東遷黍離作桑間勝似釣  
天樂乾坤莽莽千餘年誰把深心寄弦索冷先生鼓大  
雅適不遭其時十載風塵暗關塞滿城戎馬苦亂離吳  
山深處一茅宇五絃獨對天門揮天門蕩蕩隔滄海海  
上千戈故相待片帆欲發空歸來只有宮商袖中在兩  
鬢蕭蕭意惘然又將歸住吳山巔人生萬事多齟齬幾  
時得似羲皇前冷先生鼓大雅且勿生憤惋憤惋心不

和憤惋思不遠只今驛騎燕山通此調可獻明光宮聲  
音之感疾如影聖心即使起鴻濛一人唱于萬人和天  
下盡荷雍熙風烏生有淚不復洒融融洩洩無聲中

寶鏡篇

楊家寶鏡雕匣藏玄錫白旂發好光夜月團團絕纖翳  
秋潭炯炯生寒芒當時精金曾百鍊背紋鑄出雙鳳凰  
鳳凰聯輝碧玉裏二雛鼓翼同翱翔厭勝回文蟲篆小  
帶葉疎花合昏繞細如洮石紅如沙幾世傳來得稱寶

中有文龜窵窵深綵絲作線結同心楊婦晨粧照顏色  
要見兩鬢霜雪侵不期落地竟摧折鳳碎鸞孤圓半缺  
從此晨粧不復施坐對青燈自嗚咽只今已老白髮垂  
終不取鏡重鑄之留與楊家作明鑑半鏡只此團圓時

山齋歌為義興吳公選作

平生好事偏好山山齋寂寂山人間馳瓌騁異疊層玉  
蓬萊忽在軒楹間銅官我我欲飛起日射寒光翠如洗  
香蘭轉首招紫雲左右低昂若兄弟洞庭之山浮具區

東西對峙如雙鳬卞山馬脊浪中出蕭蕭竹樹茅簷孤  
偶憶仙人有遺跡興入松蘿幾雙屐巘前咲看黃精花  
洞口高眠白雲石下山獨泛秋風船霜林剖橘呼老仙  
不願長生授丹訣蕭散即是壺中天山上神仙知此意  
故遣山靈獻佳致紫烟回伏掛高崖舞鶴翩翻到平地  
天池石壁飛懸流人參化人松下遊絃管齊鳴青鳥過  
虹蜺一道丹光浮山人曾挹紫薇露南北輶車走烟霧  
功名倏視如飈塵投簪竟入山中去清風吹滿山人家



山人手煎陽羨茶詩成不復寄人世援琴一鼓飛雲霞  
山人山人信幽獨我欲相隨卧空谷何當先為采松花  
石廩賸儲三百斛

題胡仲厚所畫山水圖

胡隱君畫山水滄筆俱勻世無比平生出入范華原范  
有聲名抗關李亂山壁立氣勢雄盤礴造化搏空濛我  
走江南不可見無乃嵩華烟雲中況有層巒積飛雪萬  
丈寒光耀天闕正似玉龍天上來虎豹出林肝膽裂河



流橫絕水成梁關門陰陰道路長谷口桃花舊開處藤  
蘿古屋烟蒼蒼東崦琳宮炫樓閣中有神仙稅黃鶴鳳  
笙麟脯醉瓊漿靜看松飈起寥廓遠山隔水何冥冥放  
游不得呼山靈但見輕雲過山去雲邊一點芙蓉青隱  
君今老矣揮灑已絕筆好事得盈尺重之如異物朱君  
對此酌春酒興入高深不論斗呼我共醉山水間古今  
消凝一回首

白雲歌送孫子章歸天台省覲

天台山上白雲飛，素光零亂如白衣。朝飛不離蒼蘚石，  
暮飛掛在青松枝。昨夜白雲入我夢，月滿寒溪水如汞。  
老鶴孤鳴子和之，夢斷中宵忽心痛。我欲招白雲，白雲  
不肯來。白雲白雲，使我心悠哉。眼望白雲清曉立，歸心  
勝似雲飛急。三年不走天台山，今擬穿雲毳衣濕。尋常  
白雲長滿山，他人注目如等閒。吁嗟萬事不我好，我心  
獨與雲相關。桃花洞口青春好，不逐山人拾瑤草。朝朝  
暮暮白雲中，把酒高歌對穹昊。

秋巖將軍歌

秋巖將軍身姓韓恐是齊王之子孫不然胡為習戰鬪  
雄材傑出千人軍目光流電氣繭雲錦裘綉帽七尺身  
上馬揮戈日退舍下馬論事霜逼人南州封狐口飛火  
將軍三箭疊奏勲東海短狐毒人影將軍舳艫突其羣  
壯哉虓將有如此可作金城衛天子風雲浩蕩天萬里  
回首虎賁無猛士今歲來為四明客明人見之俱辟易  
麾斥部伍歸故壁前後旌旗半天黑我詫將軍立踟躕

神游千載究且圖古來驍將文武俱至仁或與天為徒  
將軍將軍必見天子呼訓練之暇多讀書

賦得吳王避暑宮陶侃讀書堂二詩送丁鶴年

歸武昌

章華之臺浮雲空繁華又到吳王宮西山烟光照林麓  
南浦雲氣隨蛟龍瑤殿金扉倚虛曠象牀玉几生雄風  
忽然夢入紫微內綃衣霧濕天香中夢醒芙蓉日亭午  
但知六月不知暑侍臣不敢催鸞輿輦路光飛洒塵雨

當時銅雀凌漳河錦城雪影搖岷峨天下蒼生苦埃鬱  
三處較涼誰最多東下長江二千里樓閣高連冶城起  
豈知炎熱正如焚鼎沸難容一杯水初憂未破曹劉牆  
再欲食魚還武昌回首寒溪舊遊處烟草淒淒畊牧場  
君今歸去訪遺跡自古興亡休歎息有酒可獻重瞳墳  
南望九疑纔咫尺

千年陶侃讀書堂故老相傳在武昌九曲亭前入雲路  
寒溪下接江流長劍池龍去日色薄梅偃層崖幾開落

書堂為寺寺還荒惟有青山度黃鶴當日讀書清夜深  
至今遺響聞空林千里旌旗入州牧都在分陰辛苦心  
君泝長江忽歸去政是英雄讀書處百靈奔走護先丘  
就結茅堂倚高樹平生讀書才氣多要回落日揮長戈  
蒼天不借丈夫力鬢霜獨奈秋風何且訪雲間入林下  
依舊從容詠風雅古今窮達貴同風莫媿前人面如赭  
吳王都武昌去武昌數里許西山之麓建避暑宮前  
面南浦九疑山上隔一湖宮側有洗劍池上有九曲

亭再上一里許有寒溪寒溪之上有陶侃讀書堂山  
上有樓后侃討海賊得銅鑄觀音於沙上奉於書堂  
就捨書堂為寺今寺亦廢為鶴年先大夫丘隴鶴年  
廬於其側

清眺歌為屠隱君

景定橋東地迂僻百尺層樓寄寥閒我來登眺風日清  
遙見羣山際天碧西山積潤岡阜多斷而復起連金鵝  
金鵝飛入大梅去太白數點低雲蘿水出迴溪瀉三峽



分作支流更回合晴波耀日日倒懸龍奪明珠動鱗甲  
桃花隔水春冥冥漁郎夢醒扁舟輕杜若蘼蕪翠烟淡  
鶉鴝飛去雍渠鳴白雲窈窕山中來渚涯倏忽成樓臺  
風收雨散四郊靜眼中一片青天開中有仙人半銜醉  
喚得孤鸞落天外騎鸞時復遊紫京夾道花香襲環珮  
仙人自昔好樓居此非圓嶠為方壺回首人間暗塵土  
蟻垤自以為仙都我聞江湖好山水曾託秋風過彭蠡  
千里歸來空自憐靈境勝區那得此仙人有酒春滿缸

夜邀子晉吹玉笙朝朝不放下樓去朱顏直要凋三光

送任雲翰歸省

青衫從事南來久公館煩憂托杯酒風吹酒醒憂不除  
復泛扁舟訪良友江上茅齋春草深蒼頭抱琴來見尋  
手弄秋風未終曲推琴且說南來心京國官事須給餉  
故遣星馳促藩將三年坐守姑蘇城藩將愆期只驕橫  
翩然拂袖天上歸鄞江日望雲帆飛回首姑蘇暗鋒鏑  
至今未解西兵圍世事浮雲易翻覆昔日遐征命當復

歲月悠悠無奈何猶仗冰絃寫幽獨況有慈親倚門待  
指點吾兒在東海菽水雖微難盡歡鶴髮垂垂幾時在  
此言落耳何慨慷此心可以明穹蒼不失平生讀書志  
青天萬里終高翔我送君行耿胸臆安得承平似疇昔  
擬將北上獻忠肝幾度出門行不得天子安居在豐鎬  
獨倚中原致天討君見總戎當苦言竹破江南事須早  
開元老栢行

開元老栢鄞城東平地有此謫下龍黃腸腐爛腹空空

五石之尊亦可容一面天然戶開闢四圍日透牕玲瓏  
瘦骨已見黑如鐵直柯豈有青於銅昔日盤盤九天上  
十畝繁陰散春浪四山雲氣接蜿蜒萬里天風翼清壯  
不知今日帶淒涼禿短竟如髡斬狀兩枝獨秀何凌兢  
元氣不減千年青密葉偏承雨露澤寸心默荷天地情  
嗚呼朽質空好在太器無成欲誰待開元遺植到皇元  
蕭然屢閱山河改開元天子錦繡焚五風十雨真好春  
李花亂落子規叫春夢悠悠空暮雲青氈舊物實何覓

幸有老栢至今存我來相對坐良久臨風默默思開元  
只今四海天蕩蕩一身苦無尺地安何當就此啖芳烈  
身生羽翼如翔鸞乘虛御風覽八極東遊閼苑西崑崙  
坐令鬼物駿奔走雷雨夜作移霜根不種崑崙即閼苑  
終當伴我含清芬

海堤行

海上蜿蜒蟠玉龍雲柯迤邐衝闌風睥睨烟雲俯深黝  
葉侯建此千年功侯出成均倅茲土能為蒼生開斥鹵

古稱賢令謝與施可道今人不如古趨功蝟集磬鼓聲  
萬杵齊捷風雨鳴南山白石走東海鮫人夜泣靈鰲驚  
從此風颺轉潮汐鬼嘖神奔奪天力人言水勇奈石堅  
誰信侯心勝於石石堤未作先土堤洪濤每入田中飛  
田舍沉淪杭稌死鹽花萬頃爭光輝鹹氣尋消舊田復  
桑柘依然滿村綠清宵促織鳴寒蛩細雨催耕啼布穀  
汝仇湖水清連天百川分注春風前花底人沽種田酒  
籬根月照催租船堤上新祠高綽楔穹碑大字書年月

共來祭祀獻雞豚幸免浮生作魚鱉黃金世上山蹉我  
日日散人能幾何侯橐曾無一銖費姚江拍拍流恩波  
世事年華倏忽改堤與侯名應長在海濱盡得如侯堤  
那有桑田變滄海

紫翠丹房歌為周伯高賦

松陵四圍天接水中有丹光夜分起燒丹者誰抱拙生  
半畝雲房石林底縹囊玉軸紛圖書清風適起燒丹餘  
白日閒花落蛛網晏然獨坐青氍毹當時龍虎守深闕

好事何為傳紫翠每令人費買舟錢日日來尋隱居地  
因聞昔日瑤池仙寶鼎丹光飛上天剡剡入雲如紫電  
英英照人蕙翠烟平生學仙心所羨亦欲丹光成九轉  
等閒白骨埋蒿萊不似紅顏生羽翰宿火未消丹未出  
詔向神京試儒術力言丹候尚須調再願六藏歸一室  
我到鍾山偶相逢鄉心未吐謀先同亦有長生不死藥  
何當與子論成功

醉歌行贈定海守禦江將軍



三年不見江將軍離愁遠雜春山雲今歲江城忽相見  
秋水還如舊時面將軍昔隱徽山中仗劍一起無英雄  
雲飛電走得真主永新坐挹溪樓風我在鄞江伴鷗鷺  
鷗鷺深憐髮垂素不期遙聽石龍吟又復栽花永新去  
咫尺偶同雲影間將軍正值弓刀閒我雖官事日如壘  
有琴只為將軍彈星石光搖水西柳林泉氣接天邊山  
東山松覆老僧榻南華月浸仙人壇每將俸米換春酒  
到處追歡不論斗歡娛未盡相知心鴻燕誰知各分首

將軍超擢鄞江行我被遷謫居濠梁鄞江是我釣遊處  
我反不得歸故鄉清流關上車折軸楊子江中浪如屋  
音書阻絕可奈何毛骨無由化黃鵠昨荷天恩放歸里  
再見將軍喜中喜曠達之士忘升沈酒醉清風復相似  
鄞江娟娟照胸臆江上羣峰翠嵐滴汀鳥渚花催往還  
早暮揚舲信潮汐嗟哉我今空白頭將軍建立功名秋  
只恐飛騰九霄去寸心千里還悠悠

陳中復先生所畫馬轉贈吳生好德

曹將軍能寫真南薰殿上數承恩千載有遺跡畫馬尤  
絕倫陳先生最儒雅亦能寫真兼畫馬筆法妙入神諒  
不在曹下近歲奉詔寫御容金門玉殿春融融適值房  
精降沙苑佛郎所進當爭雄就救丹青記祥瑞御前颯  
爽來天風從此人間不易得得之勝得真花驄昔年遺  
我一紫燕正是蕃人遠來獻我藏篋底餘廿年王真君  
夫豈曾見吳生讀書有遠志比似名駒復何異轉將此  
畫持贈生要助天衢激昂氣吳生吳生意如何贈汝錦

段不足多生年正壯吾老矣他日乘肥莫忘此

白雲山房歌

何處茅堂對山結千古龍洲最清絕武山秀奪天東南  
上有神僊擁珠闕金華玉華山更清亦有仙人吹玉笙  
白雲騰薄捲秋浪晴牕不掩風泠泠堂前小徑石苔紫  
堂後靈芝兔垂耳竹陰滿地生晝寒落盡松花落松子  
堂中一榻擁青氈為愛雲山長不眠茶竈只留花底石  
酒壺或汲溪中泉陸走曾期訪天姥道上回風暗塵土

舟行曾約訪蓬萊海上驚濤撼檣櫓不如長日看武山  
武山自是非人間昨日雲飛亂峰頂今日山腰散微影  
畫圖遙憶米元暉自怡肯作陶弘景勒名招得劉職方  
賦詩每同蕭與王俯仰乾坤劃然嘯啼鳥一聲山日長  
還聞種玉玉易長玉氣英英白雲上他年見璞莫自獻  
只向茅堂挹蕭爽

惠墨歌

劉侯以墨見貽上有繼善堂三字偶同余字侯亦詫

馬索賦此詩

劉侯贈我龍劑墨廣踰一寸脩減尺豹囊初解麝蜚香  
麋膠已漫鑿炫色庭珪骨朽內府空欲購空懸萬金直  
此非庭珪亦自奇炯炯涎涎堪愛惜中間復有小隸文  
却將余字先題刻鍾離合在甕中書王巨偶登江上石  
我方蠖屈守蓬蒿侯正騫騰走南北浮雲萬事果何如  
恰恰遭逢董溪側問侯此墨何從來更為徘徊一追憶  
昔年奉使湘潭中偶聽松間杵聲急青女三五擣玄霜

滿握芳馨喜分得太平天下忽干戈珍佩奚囊忍拋擲  
幾番回首望湖南大半蒼生死鋒鏑千里無人風雨秋  
舊日潭州今瓦礫墨工尋亦散如烟似此松煤更難覓  
我聞侯言長太息再拜持歸重雙壁瞳瞳初日下簾櫳  
謾謾涼風吹几席正襟端坐興如泉旋取蟾蜍瀉餘瀝  
雲浮鐵硯紫光寒字學銀鈎漆漿滴墨雖可盡心無窮  
媿乏瓊琚報侯德願侯北上扶飛龍願侯西征除毒螫  
謫材不比陳壽徒定當作傳昭殊績揮毫瀋墨細研磨

蠅尾蠅頭書一冊

雲山圖歌

雲山雲山一何好日夜無端入孤抱平生性僻愛雲山  
豈知却被雲山惱昔住闕湖烟水東一行一坐青山中  
青山起伏春藹藹白雲吞吐天空空尋復扁舟泛吳越  
吳越青山更清絕聯聯翩翩接荆楚千里白雲如噴雪  
只今置身城市間可怜舉眼無青山琴撫歸樵碧牕靜  
歌詠紫芝清夜闌安得便攜妻子去入山竟作山中住



縱然賓客遠相過山窅雲深不知處自念少時貪讀書  
壯年立志卑唐虞半世未明周孔學九重空望夔龍趨  
短劍雖曾鑄頑礦蒯緱零落塵埃冷忍聞天下暗旗旌  
耕莘釣磻向何境仰天俯地徒爾為與世低昂心轉迷  
幾迴對飯不能食慨然只起雲山思城中隱君胡仲厚  
酌酒論詩十年友經書不獨滿胸中畫作何曾在人後  
知我已是中人先為畫山兼畫雲晴天倒飛秋海浪  
浪中亂疊蒼龍鱗中有喬林結層綠長梢半掩溪邊屋

兔迹鳥道隔重巒正好開門枕寒玉我得此圖良慰心  
但覺雲山思愈深他日能償結茅願可無仲厚來相尋  
袖拂白雲相對坐坐久嗒然吾喪我此時不復有雲山  
山鳥自啼花自墮

王山人桃花牛歌

王山人王山人天地之間六尺身身著短布袍頭戴折  
角巾倒騎桃花牛日日弄晴雲昨日我向桃源去去覓  
山人結茅處山人正騎桃花牛不下牛來笑不休牛身

乾淨白於雪亂點餘花噴猩血愛騎不是王山人一生  
空與尋常別王山人王山人爾如何昔年曾走燕山道  
五花駿馬金盤馳今歲騎牛行犂确畢竟胸中有真樂  
氣吞百萬五陵兒始可騎牛作狂客王山人王山人更  
辦烏鹽角高吹紫芝曲五湖四海春茫茫桃源市上千  
山綠

醉歌行贈夏叔幹

昨日江上沙東頭漲起西頭倒今日江上沙西頭漸高

東頭少子少我方壯子壯我衰老氣義還如舊時好我  
昔南回凌瘴烟惡風掀歎西江船歸來無處采薇蕨自  
向江頭弄明月隔江美人招我游白沙翠竹明月升天  
風瀟瀟落寒水一去便為三日留回頭看人世世可  
長歎贈人不有錦繡段誰肯報之青玉案子獨愛我春  
草青我獨愛子雙眼明凹鏡那知玉顏好急絃始見枯  
桐清莫信飛鴻書可寄莫信盟鷗不相棄不如澆密向  
餉中到底甘甜復聯綴子有酒浮玉缸我有詩克錦囊

我醉子酒子歌我詩詩餘酒醉春陽熙熙醉裏乾坤漫  
顛倒梨花亂發流鶯啼鶯啼不須歇梨花不須落古道  
千年只如昨

贈楊允銘小篆歌

史籀大篆李斯變變為小篆今獨傳繹山秦望石皆裂  
餘者散失如飄烟詛楚之文大相似先出李斯三百年  
李斯無乃踵其武體同畫異難後先後傳八體亦有篆  
雕蟲何由得傳遠漢武書師蛻凡骨曹喜李潮探御籒

徐鉉承之非不佳形質僅堪稱蝸陷同時作者豈無人  
欲得美名何偃蹇元初最數松雪翁白野亦可追其蹤  
鄱陽伯溫用心苦錢塘益思無限功四明文運代不泯  
學字亦有前賢風三代鼎彝俱在目楊生晚出叅其中  
楊生深用李斯力能使筆鋒歸正直清園瘦硬玉削成  
每逢好事留其蹟人心正喜趨末流誰將曠古淵源求  
倘使淳風追前代楊生亦足裨皇猷

題鎬商觀弈圖

洞中隱隱鳴玉杵洞口泠泠滴鍾乳何物山人雲滿身  
目有神光面如女口談天地覺支離託意手談無是非  
力守中虛得玄牝掃除邊幅窺玄機玄機一破有真樂  
黑白不令雙眼迷高駕飛龍游恍惚緩騎日月無東西  
尋復遐征覽八極金井垂蓮獻佳色秦關趙壁任相持  
我道紛然爭不得山中雲路何時通採樵突入蒼髯翁  
倚徙旁觀如啖蔗骨毛漸漸生清風下界兒孫已成鬼  
更為從容看孤子大浸稽天金石流出入縱橫不曾死

斧柯爛盡斧有靈直使再三窮杳冥倘自蒼茫下山去  
白頭老瘦何足驚大唐畫工觀察使寄興雲霞知此意  
霜紈筆法似輕霏散作涼飈激人世

空青歌為臨江何九思賦

九思得空青以古罇釭盛水浸之郡人彭聲之僧丈  
公首成短歌予亦同賦

噫吁戲吾聞地不愛寶胡為乎空青土中少五金生處  
方有之鬼禁神呵閤深窅水漿如汞石殼黃殼如桃核



含水漿石團金氣瀝為液碧色湛湛氷雪涼它器收藏  
即消散以沙錐石纔取漿取漿一滴療昏青白日食既  
還耿光石孕精華幾千歲白璧明珠豈為貴神農未必  
知有靈誰啟玄關救人世玉山我我雲樹深何君得此  
良苦心鋤釵盛水浸寒玉幾人欲售空持金噫吁戲世  
上之人云有目白日猶如夜無燭后土何不令空青出  
土泥沙然大使何君療人雙目全

宋生代兄從軍行

昨日點兵兄起別弟代兄行氣吞鐵寶刀颯颯生陰風  
直到淮河蹴冰雪木蘭女兒代父行弟為丈夫不代兄  
丈夫能盡骨肉情萬里之外如戶庭兄但晏眠莫憂弟  
淮流近接蛟門水明年五月見茶船先寄官倉月支米  
官倉月米拜天恩未必長為識字軍年年射鴈得兄信  
勝似參商同一門

石塘舊隱歌為秦和蕭文學賦

我聞石塘山水好溪浸水壺四山繞上山回首望前山

更有三華似三島人家簇簇如桃源不餐松栢身自僊  
耕山百畝燒野火鑿池半頃通溪泉君家有書常滿屋  
讀盡還聽子孫讀石塘簾捲隔溪雲前後清陰散松竹  
每逢佳節酒筵開只與鄰翁相往來昨日尋花入林去  
今日採藥緣山回早語兒郎納租稅莫召喧呼打門吏  
年年如此不出山遮莫漁郎引入至

題江村漁話圖

青山玉立暮烟紫雁雁低飛落秋水樹頭斜日照寒沙

船杙寒潮兩相倚老翁共言知若何定言江上有風波  
乘潮撒網得魚少入市賣魚錢不多昨日螺蚌網中得  
中有明珠人不識我無所用還老龍醉起推蓬四天碧  
見說山中多蕨薇采而食之無是非雖是無魚換村酒  
也好尋仙看弈棋我觀此畫倚江閣耿耿無言山日落  
何當走訪真老漁添我船頭共盤礴

屈海童歌

九月淒風振衰柳偶向村家沽美酒酒邊有客屈海童

裳不掩脛衣見肘平生素解歌北詞為歌蘇武牧羊詩  
歌聲激烈出金石餘音不斷縈柔絲座上才郎舊相識  
指點海童談夙昔海童本是關中人東走錢唐寄蹤跡  
青樓一曲繞行雲脫贈錦袍無所惜自傷悞入風塵中  
遠謝花衢貴遊客金銀覆地招不來勢歟薰天呼不得  
青紅羅綺長滿身街頭美味日買新誰知世事不可料  
來作濠梁輸作人只今願歌人不聽一飯與之歌數聲  
忽憶錢唐舊風景欲去復止涕泗零我聞此語感中抱

花落汗衢不如草世間多少負奇才生不逢時亦枯槁

長平戈頭嘆

降虜之戈輿入關千年尚落泥沙間腥鐵陰生紫花出  
血痕半蝕朱砂斑驚看故物為磨洗似見風雲掌中起  
風雲慘澹坑塹深冤氣浮沈鐵光裏當時揮戈期第一  
一鼓能回魯陽日誰知括母空上書竟墮長陵銳頭術  
遺鐵尺餘人共傳四十萬人誰見憐人骨烟消鐵無恙  
流傳作鑑非皇天天下茫茫仗真宰格鬪何須血成海

長平道上有人行百勝秦兵豈長在

一笑軒為指南禪師賦

一笑軒在何處遠在樂清之徽靈山之岵山倚東溟鳳  
飛舞禪師燕坐蒼蘊林玉環墮地烟霞深螺光夜蜚明  
月浦猿聲晝落清風岑綠筠江上碧天闊石梁下有蒼  
龍吟雲髻戔戔兩峰起雁蕩回頭似千里天台劉阮隔  
松蘿虎嘯寒巘月如水金鵝玉几相鉤連古洞天垂四  
窓底千峰飛繞五雲門禹穴沈沈石苔紫梅花傲兀西

湖春蘇堤烟草迷香塵細數經行總塵跡落花啼鳥空  
憐人欲度蓬萊路非遠弱水無端忽清淺歸來故山尋  
舊遊但見荊棘埋荒丘更復凭闌視千古海內分并幾  
朝暮豪家貴戚趣風雲不直朝陽斂春霧才執有人誇  
第一獨恨長生苦無術學仙縱復三千年世上無過似  
今日空林昨夜起秋風悄然目送歸飛鴻詩傾三峽不  
可寫都付青天一笑中青天一笑知者少白日當空解  
相照不如身世作虛空悟得拈花發微笑



禪師受經靈山玉環蓋其鄉名也明月浦清風岑綠筠江龍吟橋皆靈山景也嘗住鴈宕雙髻峰壽昌寺後遊天台明越蘇杭等郡復歸靈山

題教子升天龍圖

大龍氣勢何奮疾小龍兩角猶繭栗黑雲上下風蕩滴前顧後隨恐相失恠態迸發胡為然乃是教子飛上天  
天宇蕩蕩足蜿蜒下視魚鼈徒深淵我聞龍性自變化  
若待教焉良可詫僧繇道子意太奇醉墨淋漓為此畫

君不見葛陂杖雷澤拔倏忽妙用尚爾多真龍之子宜如何

送督造海舟錢使君還錢塘

鑑湖五月風露涼玉人簸弄明月光陸離文采底相似  
芙蓉下映雙鴛鴦咫尺題詩掖垣去綵筆香凝紫薇露  
長風吹送到蓬萊又覽珊瑚海中樹勒馬催船雲滿袍  
樓船坐見帆檣高食單初捲賀監宅歸心已渡錢塘潮  
我昔東還卧荒甸江海才華半相見山陰只共浮雲間

不見能詩玉人面玉人環珮風泠泠  
戴山甬水空含情  
即今天子愛文采春風殿上賦流鶯

贈都閫掾張彥剛

子房一進圯上履  
幃帳風雲掌中起  
遠孫彥剛冰玉壺  
胸中亦有黃石書  
天子龍飛定天下  
談吐無由向我馬  
只今天下磐石安  
竟作河干伐檀者  
昨日括蒼天狗落  
賊起黃疉徧林壑  
林壑入雲千萬重  
猿猱欲度猶錯愕  
上挾罡風身有翼  
下挾妖狐走荆棘  
陰霾半掩平陽村

自謂飛來擒不得九重詔遣延安侯祥光一道東南浮  
侯策奇勛見開國豈將大木論蜉蝣君始從容在幃帳  
手畫山川調虜將君言百丈西走門欲斷咽喉須百丈  
侯即分兵從後攻果趨百丈遭前鋒等間斬首風雨歇  
凱旋未必君無功豹露一班聊復爾海水淵淵誰見底  
丈夫要作英雄人定有聲名動天子天子掄材政云急  
瑤殿雲深看徵入莫將歸夢繞瓊花功業先從盛年立

翁婦行

永嘉翁子期娶婦僅兩月值兵亂婦被虜入何將軍  
帳中至京師生二子後子期役於京師遍乞食公侯  
家偶至何將軍宅婦聞鄉音問之正子期也題詩一  
首詭以書託寄鄉中親故既而何將軍察知之捕子  
期奏上上發其緘乃其妻詩也為憐而釋之俾同還  
鄉里

東甌兵亂夜深哭嫁郎兩月他家宿雙飛燕子在雕梁  
何為翻作野鴛鴦十年鳳城悲遠道暗惜花顏為誰好

羽林將軍歡愛多其如雖雖鳴雁何劍戟門前日亭午  
隔簾乞食驚甌語問之元是舊鸞交過眼雲收轉愁苦  
將軍閨房錦綉林郎情自重千黃金援琴作曲向郎道  
恨郎不識琴中心封詩寄人託郎去正寄與郎郎不悟  
豈期先得動天顏花作丁香復如故已為將軍留兩兒  
將軍未必無好妻只恐清風嶺頭過血痕尚有空岩詩

金陵行送王廷助

楊都之區胡為乎第一豫待千年聖人出天開地闢鬼

神驚萬里祥光中  
蕩滴波濤接天天  
塹成鍾山故作雲  
錦屏三井岡頭烟  
樹清白下左顧琅  
琊城景陽武壯相  
倚重中茅九華遙  
夾拱龍池氣薄長  
干祠玄武湖中斗  
牛動紫薇宮闕天  
中央天門蕩蕩日  
重光聖人端居五  
雲表手握乾符清  
八荒繡衣朝叅萬  
馬集瑤階日轉千  
花香四夷賓貢走  
珠玉簫韶九成飛  
鳳凰太行西頭空  
颯爽咸陽洛陽漫  
相望汴水東流知  
幾年自古金湯無  
此壯五風十雨民  
熙熙總願觀光逐  
仙仗春風環珮動

香塵不覺飄飄紫雲上  
王郎王郎氣如雕鶚隘九州  
身生羽翼非夢遊  
山中種玉玉已長  
正是持獻明堂秋

為石龍吳簿寫竹併題

吳住嶺南橫浦

大庾嶺上梅花多  
勞我夢思無奈何  
昨日親從嶺頭過  
梅花不見空烟蘿  
回頭嶺下有橫浦  
翠竹娟娟照窓戶  
山雲不起清風來  
亂葉聯翩似飛舞  
橫浦揚塵曾幾年  
獨有此君經歲寒  
况復春雷子孫長  
何人不為停車看  
我今陵水每追憶  
貌得踈枝慰寥閨  
不愁作伴無梅花



只保冰霜好顏色

賦

春草賦

粵稽永嘉舊郡睹謝池里賡謝池吟予自雁宕倦游抗  
志幽尋熟玩斯景長嘯不禁客乃對予而言曰康樂有  
云池塘生春草園柳變鳴禽先生有心予志之矣於時  
春也蔚焉成林禽聲未換草色芳深奈牽行役莫遂登  
臨天涯兄弟惟子知音願賦春草以慰我心予不獲已

賦之何陽律之柔暢乃池塘之發生始抽根以隱隱旋  
布葉而盈盈既搖風兮帶媚復向日兮含榮飛采芳之  
蛺蝶集點水之蜻蜓色映袍其覺重香隨步以疑輕任  
躡蹠而無阻從攬擷而不爭應鵲聲乎泪落依馬足矣  
魂征類愁客之無緒同顰娥之有情乃若氣煦郊原沙  
蒸水岸露意漸斂烟霧初亂延綠兮紗窓流青兮綵幔  
懷人兮志往翫物兮襟散飄落花以無迹裊遊絲而不  
斷想舞燕之頻催聽啼鶯之互喚則有染翰騷人尋芳

逸史杖懸赤仄囊攜綠綺整折角之素巾躡遠遊之文履指柳陌以嚮導經花堤而徙倚蘚封階而迹絕鼃開樹而聲止奈所訪之不逢復何心乎戀此嗟嗟芳草兮愁春芳春兮愁人草隨春而並麗愁逐草而俱新有草愁難歇無愁草不勻草生魂夢際愁動別離辰於是水漲斷橋雲沈祕閣鑪香火寢壁瓢風落蝸黏筆架鳥窺牕格應門幾童載酒何客亮瞻雲之惆悵知倚閭之小度茵展地而靜悄帶臨書而寂寞愁不絕乎池蛙怨豈

忘乎野鶴雖追歡之在後恐對景之匪昨可憐哉春日  
兮輝輝春草兮依依草生兮侵徑日落兮掩扉池塘物  
色已如許為問王孫歸不歸客乃喟然而嘆曰池上孤  
樓青陰映帶萋萋芳草遠與天界入我揮洒用酬文債  
草榮春盡此文不壞

樂府

烏生八九子

烏生八九子飛鳴高樹顛少年從何來中我泥彈九我

不能支呬呼蒼天蒼天不聞摧我肺肝東林有梟西林  
有獍彈不加彼乃戕我命我命曾不如線之微我肉不  
足登鼎俎爾將奚為蒼天蒼天我不能高飛但願浮雲  
載我東歸

公無渡河

公無渡河公無渡河公若渡河吾將奈何河水有懸流  
魚鼈不能居公力不如水乃為鼈與魚河水勝鳩毒河  
水勝矛戟河伯不相邀胡云避不得吾聞狎於虎死於

虎狎於水死於水公性揚揚急如駛河水一去不復回  
公今一去寧復起公不起自取之公兮公兮將怨誰

烏夜啼

明月照庭樹淒風入重闌昨夜啞啞烏亂啼烏亂啼烏  
頭未白君未歸憶昔持綵線繡君雙鳳凰比妾百年心  
與君不相忘手中綵線君奪取袞衣有闕君欲補遠道  
一去今十年轉向濠梁作羈旅黃金用盡寄書來妾啼  
更比烏聲哀妾面曾因女孫笑君懷得為何人閒願君

清商託瑤琴夜夜寄我空中音願君珠玉傾錦箋時時  
寄我綠牕前

搖搖花

即虞美人草  
一名寒食花

搖搖花花魂未還家花搖搖花魂未曾消昔為脂粉顏  
娟娟比花好今為草上花依依向誰道項王氣力無與  
比四面胡為楚歌起離之不逝將奈何寧惜花顏帳中  
死花顏當日老深宮香玉消沈烟霧空不如化為寒食  
花一年一度開春風漢王宮闕亦何在回首山河幾番

改行人欲去還問花百媚春容更誰待

寡婦詞

浮萍為妾身池水為妾夫水深萍乃榮水乾萍乃枯夫  
壻共鄉井妾心長自慰夫身遠行役妾顏為顛顛顛顛  
何足惜終勝生別離誰知竟死別妾身何所依酒未濕  
殞土殞土無寸草屯吏籍姓名屯長催上道鄰婦拭我  
淚兒女牽我裳行行問何之未知適何鄉死者呼不聞  
生者歎薄命賣我嫁時釵破我嫁時鏡破鏡何所似正



似初弦月月弦有圓時破鏡難再合夫婿如有知魂魄  
隨我行大石沈水底可鑒妾中情

題馬圖

馬何良金吾出神英英簪佗佗錢聯聯玉粟粟劣慄輕  
兮陋驛突馬何徠涉流沙十日奇萬里嘉跼天閑志靡  
它天閑遠兮人弗誇馬何厄勿歔歔雄傑喪戰伐滋臬  
騎角馭者誰于斯息兮待其時

秋風歌三章

秋風秋風吹我母我母溪山倚閭久家徒四壁衣見肘  
欲寄秋風竟鉗口便欲歸去訊安否致奉珍鮭亦何有  
仰屋潸然復低首暮冷朝寒博升斗秋風秋風慎勿吹  
我淚飄洒母前傷母意

秋風秋風吹我兄我兄與弟皆惻惻秋來聽此秋風聲  
江山契闊難為情去年兄作錢塘行今歲歸來弟蓬瀛  
何當從此長合并日拜慈母稱壽觥秋風秋風慎勿吹  
我語使兄聽之亂兄緒

秋風秋風吹我身我身何處滄江濱感懷日日潛悲辛至  
今只作尋常人人生得意在青春青春一過徒勞神嗟哉  
尺蠖何時伸不如一棹歸娛親秋風秋風慎勿吹我詩  
入人之耳令人悲

北風辭送余舜容之京

北風其涼吹子之衣裳我有古琴為子彈慨慷羣爵飛  
舞雲低昂猗蘭在畹天雨霜天門九重兮虎豹在傍子  
之去兮道路長


北風其淒吹子之裳衣我有參差為子寫所思乾坤莽  
莽烟雨霏商鼎剥落售有誰軒車頡頏兮富貴是依子  
之去兮慎所之

馬食粟

馬食粟馬食粟一閒二百匹一食一百斛去年大旱人  
苦饑草根食盡食木皮官司徵粟餒官馬馬何貴重人  
何微人心不敢怨只願官馬肥官馬肥走若飛江南江  
北正格鬪將軍殺賊要馬騎

龍淵有珍寶

龍淵有珍寶珊瑚與木難貪者入波濤出入渤澥間手持珍寶歸富盛良不艱隣女相夸耀小兒多覲顏貪夫之貪終不了再入龍淵探珍寶老龍崛起白日昏大浪飛來雪山倒等閒性命斷柔絲魚鼈飫餐烏啄之爺娘妻子仰天哭珍寶如山亦奚為



春草齋集卷二